

也既而一搏先贈雙襟自露斑荆之味意厚沈醉正酣丹棘之方功空離憂未忘以言後會骨驚前期鬢  
老揚岐路滑吾之送人多年李門浪高人之送吾幾日仰訴靈廟之精俯慙祖席之客云爾○中略

仲冬餞齋上人赴唐同賦贈以言各分一字探得輕字

慶保胤

夫人之重別古今一也我朝率土之中遠則一二千里分手之後久亦五六餘年書信易通不期鴈足繫  
帛之秋歸去無妨豈俟烏頭變黑之日乃如其臣之別君子之辭父猶遺一日三秋之恨又有牽衣攬淚  
之悲何況異域他鄉天涯煙水前程不知幾雲關露驛後會不遵何春風秋月嗟呼情思今日之遠行不  
似吾土之當別往昔緇素非一渡海者多矣聖教未傳或專誠於求法之年王事靡盬或委命於人觀之  
節如我師浮雲無蹤一去一來靈舟不繫自東自西昔仲尼之去周也仁者相贈以言今上人之赴唐也  
親知各露其膽子是花月之一友贈此芻牧之二言堂有母儀莫以逗留中天之月至有師跡莫以偃息  
五臺之雲聊記斯文別淚露紙云爾

夏夜於鴻臚館餞北客

後江相公○大江朝綱

延喜八年天下太平海外慕化北客算彼星躔朝此日域望扶木而鳥集涉滄溟而子來我后憐其志褒  
其勞或降恩或增爵於是餞宴之禮已畢俶裝之期忽催夫別易會難來遲去速李都尉於焉心折宋大  
夫以之骨驚想彼梯山航海凌風穴之煙嵐廻棹揚鞭披龜林之蒙霧依依然莫不感忘遐之誠焉若非  
課詩媒而寬愁緒携歡伯而緩悲端何以續寸斷之腸休半銷之魂者乎于時日會鶉尾船艤龍頭麥秋  
動搖落之情桂月倍分幅之恨嗟呼前途程遠馳思於鴈山之暮雲後會期遙霑纓於鴻臚之曉淚予翰  
苑凡聚揚庭散木媿對遼水之客敢陳孟浪之詞云爾

〔新儀式臨時〕太宰帥并大貳奏赴任由事

太宰帥并大貳赴任參入令奏事由藏人以奏聞奉仰召殿上賜酒肴或不召只賜祿或雖召數巡之後  
召御前自右青環門參上候孫廂南第一間北面即賜仰及祿御衣一襲或加賜白掛一領若於御前賜酒肴殿上王卿依召參上勸盃其儀御座